



Broj: 02-04-1087/21
Datum, 01.11.2021. godine

ZAPISNIK sa 10. redovne sjednice 7. saziva Općinskog vijeća Doboj Istok

Deseta redovna sjednica 7. saziva Općinskog vijeća održana je dana 28.10.2021. godine u zgradi općine Doboj Istok u Klokotnici sa početkom u 10,00 sati.

PRISUTNI: 15 vijećnika, Kemal Bratić, općinski načelnik, Omer Hadžić, sekretar općine, Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko – invalidsku zaštitu i opću upravu i Samir Mujkić, ovlašteno lice da zamjenjuje pomoćnika općinskog načelnika za poduzetništvo i finansije, te predstavnik RTV TK.

ODSUTNI: Zerina Subašić, predsjednica kluba vijećnika PDA – Nezavisna lista Doboj i Mehmed Mehinović, vijećnik SBiH.

Sjednicu je otvorio i vodio predsjedavajući Općinskog vijeća, Selmin Karić.

Selmin Karić, predsjedavajući Općinskog vijeća: „ Uvažene kolegice i kolege vijećnici, pomoćnici općinskog načelnika, predstavnici medija esalamu alejkum i dobar dan. Otvaram 10. redovnu sjednicu 7. saziva Općinskog vijeća Doboj Istok. Molim tehničkog sekretara da utvrdi broj prisutnih na današnjoj sjednici. Znači, prisutno je 15 vijećnika, a odsutni su Zerina Subašić i Mehmed Mehinović koji su najavili odsustvo.“

USVAJANJE ZAPISNIKA SA PRETHODNIH SJEDNICA OPĆINSKOG VIJEĆA

Selmin Karić, predsjedavajući Općinskog vijeća: „ Dobili ste zapisnik sa prethodne 9. redovne sjednice 7. saziva Općinskog vijeća Doboj Istok. Ima li neko primjedbu? Nema. Ko je za?

Glasanje: ZA – 15, PROTIV – 0, UZDRŽANIH – 0

Dobili ste takođe zapisnik sa 1. hitne sjednice 7. saziva Općinskog vijeća Doboj Istok. Naime, bili smo, da ne kažem, prisiljeni da održimo i ovu hitnu sjednicu s obzirom da smo pri donošenju Odluke o osnivanju Zajedničkog pravobranilaštva za općine Čelić i Doboj Istok trebali prethodno poništiti ranije odluke o osnivanju zajedničkog pravobranilaštva. S obzirom da smo u međuvremenu imenovali privremenog pravobranioca i da nije mogla da se prijavi u poresku upravu pa nismo zvanično ni imali pravobranioca, odlučio sam da održimo i tu hitnu sjednicu, a što je naravno u skladu sa Poslovníkom o radu Općinskog vijeća Doboj Istok. Ima li neko primjedbu na zapisnik? Nema. Ko je za usvajanje zapisnika?“

Glasanje: ZA – 15, PROTIV – 0, UZDRŽANIH – 0

VIJEĆNIČKA PITANJA I INICIJATIVE

Selmin Karić, predsjedavajući Općinskog vijeća: „ Ako ima neko pripremljeno vijećničko pitanje ili inicijativu, izvolite.“

Hasan Hasančević, predsjednik kluba vijećnika SDA: „Prvo ću sve iskreno poselamiti i pozdraviti i zaželjeti dobar i efikasan dan. Imam vijećničku inicijativu, a radi se o sljedećem:

Podnosim vijećničku inicijativu da se Javnom preduzeću BH Pošta, odnosno Centar pošte Tuzla uputi molba za rad pošte u Klokočnici sve subote da budu radne. Naime, pošta u Klokočnici radi samo prve dvije subote, a obzirom da nemamo banke ne mogu se vršiti uplate u ostale dvije ili tri subote, a puno je ljudi koji dolaze vikendom i imaju potrebu da plaćaju ili da mijenjaju novac. Imao sam priliku ja prošle subote da nemam gdje uplatiti običnu uplatnicu ili struju, a u Brijesnici Velikoj je zatvorena i banka i pošta. Ovo se prvenstveno odnosi na Klokočnicu iz razloga što ovdje gravitira oko 7000 ljudi, a zna se ko dolazi vikendom iz dijaspore, a i naši uposlenici imaju potrebe za tim. Ja sam imao obavezu prema sebi i prema građanima da uputim ovu inicijativu prema pošti, a da li će to oni uraditi ili neće... Mislim da će tražiti, ali evo traže izgovor neki da dovedu banku i kada dođu ovdje bankari oni su puni sebe, donesu razne poklone i privili bi ih na ranu. Sutra će početi raditi banka po njihovoj priči, a koliko ima kako se ugasila agencija u Klokočnici, a još ništa od toga nema. Ne znam šta treba da uradimo, jer ogroman je priliv stanovništva da ne elaboriram džabe svi mi to znamo šta i kako. Ja sam našao za shodno da uputim ovakvu inicijativu, pa ćemo vidjeti kako će se pošta oglasiti. Mislim da ovo nije stalno rješenje, ali je jedno od rješenja da zadovoljimo potrebe građana koliko toliko.“

Emira Karić, predsjednica kluba vijećnika SDP: „ Pozdravila bih sve prisutne i takođe bih, kao moj kolega Hasan, zaželjela sretan rad. Prije svoje inicijative malo bih se osvrnula, jer zaista je inicijativa dobra i ja ću je prihvatiti, samo što ne znam kakav će biti odgovor. Oni imaju svoju politiku da li se radi jedna subota ili treća subota i presedana nema za jednu općinu, jer oni moraju donijeti jednoobrazan pravilnik za TK, za Federaciju itd. Da bi ih trebalo pritisnuti u tom smislu, trebalo bi da se nađe neko rješenje. Ja imam takođe jednu vijećničku inicijativu. Ova vijećnička inicijativa se odnosi na sadnju ukrasnog grmlja na zemljanom dijelu trotoara magistralnog puta M4 Doboj-Tuzla općina Doboj Istok. Financiranje ove inicijative bi bilo iz budžeta općine Doboj Istok a za sadnju i održavanje bile bi zadužene JU OŠ „Klokočnica“, JU OŠ „Brijesnica“, i JU MSŠ „Doboj Istok“. Prilikom realizacije ove inicijative bilo bi potrebno formirati komisiju u sastavu direktori navedenih škola i predstavnik općine. Komisija bi imala zadatak napraviti detaljan plan sadnje i održavanja zasađenog ukrasnog grmlja. Realizacijom ove inicijative, koja ima ekološki i estetski značaj, takođe bi proširili djelokrug rada ekoloških sekcija koje su formirane pri navedenim školama, te povećali uticaj na mladu populaciju da se uključuju u ovakve i slične projekte. Takođe znam da će neko komentarisati da nije ingerencija od strane općine, međutim kada zapada snijeg znamo mi ko čisti taj snijeg, ko mete itd. Smatram da bi Cestama Federacije samo trebalo uputiti, hajmo reći, neku obavijest ili pismo dobre namjere da mi to želimo uraditi. To je jako jeftin projekat, jer ja često hodam po rasadnicima i otprilike to nisko grmlje u određenim rasadnicima je da kažem onako narodski bud pošto. To bi se finansijski jako jeftino moglo zaokružiti, ali je bitna ova stavka ko će održavati, ko će saditi, a to zaista mogu naše osnovne škole uz pomoć našeg pomoćnog osoblja i naravno učenika ekološke sekcije. Smatram da neće biti problema što se tiče prihvatanja ove inicijative.“

Senada Džanić, predsjednica kluba vijećnika SBB, BPS Sefer Halilović i SBiH: „ Predsjedavajući, zamjeniče, načelnice sa saradnicima, kolegice i kolege vijećnici, predstavnici medija sve vas selamim i pozdravljam. Imam vijećnička pitanja koja su upućena načelniku općine.

- 1. Zašto načelnik ne insistira kod nadležne općinske službe za provođenje odredaba Odluke o ulicama, lokalnim i nekategorisanim putevima na području općine Doboj Istok?*

Obrazloženje:

Svjedoci smo stanja u kakvom se nalaze lokalni i nekategorisani putevi u naseljima na području općine Doboj Istok. Dijelovi naselja u kojima se nalaze ulice je veoma mali, te je veći dio naselja pokriven mrežom lokalnih i nekategorisanih puteva. Većina tih puteva je asfaltirana, ali je ta asfaltna traka uska, a dijelovi puta između asfaltne trake i kanala, sam kanal, živice i ograde

zarasle i doprinose otežanoj funkcionalnosti istog. To je najizraženije u najudaljenijim dijelovima naselja odakle se najduže putuje do centra naselja a najugroženiji su pješaci. U MZ Stanić Rijeka, gdje ja živim ovo je izraženo duž cijelog puta kojim se kreću učenici do škole. Općinsko vijeće Doboju Istok je dana 26.10.2013. godine donijelo Odluku o ulicama, lokalnim putevima i nekategorisanim putevima na području Doboju Istoka koja je uredila ovu oblast, bar na papiru. U toj Odluci precizirano je ko je i kako odgovoran za stanje na putevima, članovima Odluke br. 6,9 i 14. a nadzor nad provođenjem članom 25. Smatram da bi kvalitetno provođenje ove Odluke doprinijelo sigurnosti u saobraćaju, kvaliteti puteva i ljepoti naselja i cijelog Doboju Istoka. Molim vas da mi se odgovori pismeno. Sljedeće pitanje je takođe upućeno načelniku općine:

2. Kada će doći do uključenja općine Doboju Istok i Vas načelniče u rješavanje problema raskrsnice, odnosno dijela magistralnog puta u naselju Stanić Rijeka vezano sa sigurnost građana i svih učesnika u saobraćaju?

Obrazloženje:

Vezano za isti problem u Stanić Rijeci podnijela sam u prethodnom periodu vijećničku inicijativu koju nažalost vladajuća većina nije podržala, pa vas načelniče i vas kolegice i kolege vijećnici koji ste bili suzdržani ili protiv pitam šta još treba da se desi ili koliko smrtnih slučajeva i saobraćajnih nezgoda da bude da bi ste reagovali i bili za? Nemojte mi samo odgovoriti da magistralni put nije pod ingerencijom općine, jer kada su ugroženi životi građana i djece mi imamo obavezu naći put do nadležnih, a Vi načelniče i mi zajedno, odnosno ovo vijeće ste „moj“ put za rješavanje tog problema. Osim urađenog pješačkog prelaza u ovom dijelu Stanić Rijeke nema oznake smanjenja brzine, nema oznake da se u blizini puta nalazi škola (veliki broj učenika čeka i po 15 minuta da bi prešao preko magistralnog puta, naravno rizikujući svoje živote). Takođe, trotoari na pomenutoj raskrsnici su postavljeni na nedovoljnoj dionici i nikada nisu postavljeni u potrebnoj dionici puta što takođe predstavlja opasnost po bezbjednost učesnika u saobraćaju, a posebno učenika koji prelaze preko raskrsnice na putu do škole. Rasvjeta koja je trebala biti zamijenjena led rasvjetom ne samo da nije zamijenjena nego na više mjesta ne radi i niko je ne popravlja, tako da je i to u večernjim i jutarnjim satima još jedan u nizu problema i otežavajućih okolnosti kada je u pitanju sigurnost građana. Mi smo načelniče kao i Vi građani ove općine, pa ako nije dovoljno to što su nam putevi takvi kakvi jesu, što kanalizaciona mreža nije riješena, što su problemi sa rasvjetom za većinu građana Stanić Rijeke stalno prisutni, pitam Vas da li će sigurnost nas, naše djece i ostalih učesnika u saobraćaju takođe ostati ignonirana? Molim da mi se i na ovo odgovori pismeno.

3. Vijećnička inicijativa. Podnosim je Općinskom vijeću, a inicijativa se odnosi na ulaganje sredstava dobijenih od Vlade TK za uređenje i izradu dijela puta asfalta puta Aščići, imenovanog ulici 1. Interventnog voda u Maloj Brijesnici.

Obrazloženje:

Navedena ulica je djelimično urađena oko dvije trećine dužine dok je preostali dio puta makadamski i jednim dijelom teško prohodan vozilima. Posljednjih godina konstantno se povećava izgradnja stambenih objekata u parcelama uz ovu komunikaciju. Put koriste i učenici koji pohađaju nastavu u područnoj školi u Brijesnici Maloj, te i ostali stanovnici gornjeg dijela naselja jer je put kraći i sigurniji. Isti su iskazali da je potrebno uraditi navedeno što ovu inicijativu čini opravdanom, a sredstva dobijena od vlade TK bila bi utrošena u skladu sa namjenom.

4. Još jedna inicijativa, a podnosi se Općinskom vijeću. Inicijativa se odnosi na potrebu za uređenje okoline javne vode Kahrimanovača u Maloj Brijesnici da bi se ista dovela u stanje za ljudsku upotrebu.

Obrazloženje:

Poznato je da je Kahrmanovača izvor pitke vode koji svojim neiscrpnim bogatstvom Brijesnicu Malu snabdijeva pitkom vodom duže od sjećanja najstarijih današnjih stanovnika. Da je voda bogatstvo pokazalo se i u prethodnom ratu kada su moderni vodovodi prestali funicionirati ili su bili prenamjenjeni u prioritete. Stanovništvo ovog naselja i dijela naselja Stjepan Polje koje je lokacijom bliže ovom izvoru uveliko je zavisilo o njemu. Neka nam se ta vremena nikada ne vrate, ali problem sa tim izvorom je što nije za ljudsku upotrebu i ako se ne interveniše tako će i ostati. Problem je neuređena sanitarno kanalizaciona mreža nekoliko stambenih objekata u neposrednoj blizini izvora što je prouzrokovalo onečišćenje istog. Smatram da je potreba intervencije, u saradnji sa Savjetom MZ Brijesnica Mala i vlasnicima pomenutih objekata, neophodna. Voda je bogatstvo koje imamo i koje nema cijenu te je neophodno da se posvetimo rješavanju ovog problema.“

Selmin Karić, predsjedavajući Općinskog vijeća: „ Zahvaljujem se. Ima li još neko? Nema. Prva inicijativa kolege Hasana Hasančevića je vezana za rad pošte u Klokočnici. Znači podnosi vijećničku inicijativu da se Javnom preduzeću BH Pošta, odnosno Centar pošte Tuzla uputi molba za rad pošte u Klokočnici svake subote. Naime, pošta u Klokočnici radi samo prve dvije subote, a obzirom da nemamo banke ne mogu se vršiti uplate u ostale dvije ili tri subote. Ko je za ovu inicijativu?

Glasanje: ZA – 15, PROTIV – 0, SUZDRŽANIH – 0.

Sljedeća inicijativa kolegice Emire Karić a odnosi se na sadnju ukrasnog grmlja na zemljanom dijelu trotoara magistralnog puta M4 Doboj-Tuzla općina Doboj Istok. Financiranje ove inicijative bi bilo iz budžeta općine Doboj Istok a za sadnju i održavanje bile bi zadužene JU OŠ „Klokočnica“, JU OŠ „Brijesnica, i JU MSS „Doboj Istok“. Prilikom realizacije ove inicijative bilo bi potrebno formirati komisiju u sastavu direktori navedenih škola i predstavnik općine. Komisija bi imala zadatak napraviti detaljan plan sadnje i održavanja zasađenog ukrasnog grmlja. Realizacijom ove inicijative, koja ima ekološki i estetski značaj, takođe bi proširili djelokrug rada ekoloških sekcija koje su formirane pri navedenim školama, te povećali uticaj na mladu populaciju da se uključuju u ovakve i slične projekte. Ko je za ovu inicijativu?

Glasanje: ZA – 5, PROTIV – 0, SUZDRŽANIH – 10.

Inicijativa nije dobila potrebnu većinu.

Sljedeća vijećnička inicijativa je od kolegice Senade Džanić, a inicijativa se odnosi na ulaganje sredstava dobijenih od Vlade TK za uređenje i izradu dijela puta asfalta puta Aščići, imenovanoj ulici 1. Interventnog voda u Maloj Brijesnici. Navedena ulica je djelimično urađena oko dvije trećine dužine dok je preostali dio puta makadamski i jednim dijelom teško prohodan vozilima. Posljednjih godina konstantno se povećava izgradnja stambenih objekata u parcelama uz ovu komunikaciju. Put koriste i učenici koji pohađaju nastavu u područnoj školi u Brijesnici Maloj, te i ostali stanovnici gornjeg dijela naselja jer je put kraći i sigurniji. Isti su iskazali da je potrebno uraditi navedeno što ovu inicijativu čini opravdanom, a sredstva dobijena od vlade TK bila bi utrošena u skladu sa namjenom. Ko je za ovu inicijativu?

Glasanje: ZA – 5, PROTIV – 0, SUZDRŽANIH – 10.

Inicijativa nije dobila potrebnu većinu.

Sljedeća inicijativa kolegice Senade Džanić se odnosi na na potrebu za uređenje okoline javne vode Kahrmanovača u Maloj Brijesnici da bi se ista dovela u stanje za ljudsku upotrebu. Poznato je da je Kahrmanovača izvor pitke vode koji svojim neiscrpnim bogatstvom Brijesnicu Malu snabdijeva pitkom vodom duže od sjećanja najstarijih današnjih stanovnika. Da je voda bogatstvo pokazalo se i u prethodnom ratu kada su moderni vodovodi prestali funicionirati ili su bili prenamjenjeni u prioritete. Stanovništvo ovog naselja i dijela naselja Stjepan Polje koje je lokacijom bliže ovom izvoru uveliko je zavisilo o njemu. Neka nam se ta vremena nikada ne vrate, ali problem sa tim izvorom je što nije za ljudsku upotrebu i ako se ne interveniše tako će i ostati. Problem je neuređena sanitarno kanalizaciona mreža nekoliko stambenih objekata u neposrednoj blizini izvora što je prouzrokovalo onečišćenje istog. Smatram da je potreba intervencije, u saradnji sa Savjetom MZ Brijesnica Mala i vlasnicima pomenutih objekata,

neophodna. Voda je bogatstvo koje imamo i koje nema cijenu te je neophodno da se posvetimo rješavanju ovog problema. Ko je za ovu inicijativu?

Glasanje: ZA – 5, PROTIV – 0, SUZDRŽANIH – 9 (Refik Šuvalić je trenutno odsutan).

Senada Džanić, predsjednica kluba vijećnika SBB, BPS Sefer Halilović i SBiH, je zatražila pojedinačno izjašnjavanje.

Selmin Karić, predsjedavajući Općinskog vijeća: „ Sve je jasno, ali ako sumnjate u glasanje evo pojedinačno glasanje, mada mislim da nema potrebe.“

Izet Hodžić, zamjenik predsjedavajućeg Općinskog vijeća: „

- | | |
|----------------------|-----------|
| 1. Selmin Karić | suzdržan |
| 2. Hasan Hasančević | suzdržan |
| 3. Omer Konjić | suzdržan |
| 4. Refik Šuvalić | za |
| 5. Amir Mašić | suzdržan |
| 6. Jasmina Mešić | suzdržana |
| 7. Nusret Dautović | suzdržan |
| 8. Emira Karić | za |
| 9. Haris Sinanović | za |
| 10. Adis Halilović | za |
| 11. Izet Hodžić | suzdržan |
| 12. Osman Đonlagić | suzdržan |
| 13. Senada Džanić | za |
| 14. Kemal Skopljak | za |
| 15. Mehmed Mehinović | (odsutan) |
| 16. Zerina Subašić | (odsutna) |
| 17. Samir Džanić | suzdržan |

Glasanje: ZA – 6, PROTIV – 0, SUZDRŽANIH – 9

USVAJANJE DNEVNOG REDA

Selmin Karić, predsjedavajući Općinskog vijeća: „ Za današnju sjednicu predlažem sljedeći dnevni red:

- 1. Razmatranje i usvajanje prijedloga Odluke o usvajanju prijedloga Strateškog plana lokalnog razvoja općine Doboj Istok za period 2021 – 2027. godina,*
- 2. Razmatranje i usvajanje prijedloga Odluke o obrazovanju Komisije za utvrđivanje prometne vrijednosti nepokretnosti i prava*
- 3. Razmatranje i usvajanje prijedloga Odluke o objavljivanju javnog oglasa za imenovanje člana Općinske izborne komisije Doboj Istok*
- 4. Razmatranje i usvajanje prijedloga Javnog oglasa za imenovanje člana Općinske izborne komisije Doboj Istok*
- 5. Razmatranje i usvajanje Izvještaja o procijenjenoj šteti od prirodne nepogode koja je uzrokovala pojavu poplava i klizišta na području općine Doboj Istok u periodu od 19.07.2021. do 28.07.2021. godine,*
- 6. Razmatranje i usvajanje Informacije o prinosima proljetne sjetve i pripremnim aktivnostima za jesenju sjetvu*
- 7. Razmatranje i usvajanje Informacija o uspjehu učenika i postignutim rezultatima osnovnih i srednje škole za 2020/2021. godinu na području općine Doboj Istok i to:*

- JU OŠ „Klokotnica“
- JU OŠ „Brijesnica“
- JU MSŠ Doboj Istok

8. Razmatranje i usvajanje Informacija o upisu učenika u prve razrede osnovnih i srednje škole za 2021/2022. godinu na području općine Doboj Istok i to:

- JU OŠ „Klokotnica“
- JU OŠ „Brijesnica“
- JU MSŠ Doboj Istok

Tačku dajem na diskusiju. Konstatujem da su Emira Karić, Senada Džanić, Haris Sinanović, Adis Halilović i Kemal Skopljak napustili sjednicu u 10,30 sati.“

Hasan Hasančević, predsjednik kluba vijećnika SDA: „ Ja predlažem da se u Poslovnik navede kada je u pitanju ovako neprincipijelno napuštanje kao da nisu prisutni na sjednici i da im se paušal ne isplaćuje.“

Selmin Karić, predsjedavajući Općinskog vijeća: „Ko je za ovakav dnevni red?“

Glasanje: ZA – 10, PROTIV – 0, SUZDRŽANIH – 0.

REALIZACIJA DNEVNOG REDA

1. Razmatranje i usvajanje prijedloga Odluke o usvajanju prijedloga Strateškog plana lokalnog razvoja općine Doboj Istok za period 2021 – 2027. godina

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Stateški plan lokalnog razvoja, kao što sam rekao i prošli puta, je jedan od najbitnijih dokumenata za razvoj svake lokalne zajednice, pa i naše, jer on obuhvata sve sfere bitne za život u jednoj lokalnoj zajednici, društveno ekonomsku, te sferu zaštite životne sredine, naravno poštujući prostorni plan općine. Ova Strategija je sveobuhvatna, a prilikom izrade ove strategije uzeti su u obzir strateški pravci, prioriteti i mjere strategije razvoja Tuzlanskog kantona za period 2021 – 2027. godina. Sredstva potrebna za realizaciju ove strategije su predviđena u iznosu od oko 6 miliona KM i od toga bi bilo oko 20 % iz budžeta općine Doboj Istok dok ostalih 80 % od oko 4.800.000 iz eksternih izvora. Otprilike oko 1 milion KM otpada na ekonomski razvoj, oko 2 miliona na društveni i negdje oko 3 miliona KM na razvoj okoliša, odnosno zaštitu životne sredine. Ja bih se zahvalio članovima Općinskog razvojnog tima koji su učestvovali u izradi ove Strategije lokalnog razvoja općine Doboj Istok za period 2021 – 2027. godina i smatram da su uradili dobar posao. Ko je za usvajanje ove Odluke?“

Glasanje: ZA – 10, PROTIV – 0, SUZDRŽANIH – 0.

2. Razmatranje i usvajanje prijedloga Odluke o obrazovanju Komisije za utvrđivanje prometne vrijednosti nepokretnosti i prava

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ovdje su uočene dvije ili tri tehničke greške. Znači u tački 6. gdje stoji Službene novine općine Doboj Istok, broj 04/19 i u obrazloženju u razlozima za donošenje isto tako Službene novine općine Doboj Istok, broj 04/19 od 30.09.2019. godine i dole 30.09.2020. godine. To su tehničke greške koje će se ispraviti. Ko je za usvajanje ove Odluke sa ispravkom?“

Glasanje: ZA – 10, PROTIV – 0, SUZDRŽANIH – 0

3. Razmatranje i usvajanje prijedloga Odluke o objavljivanju javnog oglasa za imenovanje člana Općinske izborne komisije Doboj Istok

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 10, PROTIV – 0, SUZDRŽANIH – 0

4. Razmatranje i usvajanje prijedloga Javnog oglasa za imenovanje člana Općinske izborne komisije Doboj Istok

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 10, PROTIV – 0, SUZDRŽANIH – 0

5. Razmatranje i usvajanje Izvještaja o procijenjenoj šteti od prirodne nepogode koja je uzrokovala pojavu poplava i klizišta na području općine Doboj Istok u periodu od 19.07.2021. do 28.07.2021. godine

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 10, PROTIV – 0, SUZDRŽANIH – 0

6. Razmatranje i usvajanje Informacije o prinosima proljetne sjetve i pripremnim aktivnostima za jesenju sjetvu

Selmin Karić, predsjedavajući Općinskog vijeća: „Tačku dajem na diskusiju. Imate stav komisije. Ima li prijavljenih? Nema. Ko je za usvajanje ove informacije?“

Glasanje: ZA – 10, PROTIV – 0, SUZDRŽANIH – 0

7. Razmatranje i usvajanje Informacija o uspjehu učenika i postignutim rezultatima osnovnih i srednje škole za 2020/2021. godinu na području općine Doboj Istok i to:

- JU OŠ „Klokotnica“
- JU OŠ „Brijesnica“
- JU MSŠ Doboj Istok

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za usvajanje ove informacije?“

Glasanje: ZA – 1, PROTIV – 0, SUZDRŽANIH – 08 (Samir Džanić je trenutno odsutan). Informacija nije dobila potrebnu većinu“.

8. Razmatranje i usvajanje Informacija o upisu učenika u prve razrede osnovnih i srednje škole za 2021/2022. godinu na području općine Doboj Istok i to:

- JU OŠ „Klokotnica“
- JU OŠ „Brijesnica“
- JU MSŠ Doboj Istok

Selmin Karić, predsjedavajući Općinskog vijeća: „Tačku dajem na diskusiju.“

Kemal Bratić, općinski načelnik: „Selamim vas i pozdravljam. Ono što sam primijetio je da je smanjen broj upisanih učenika u srednju školu i to treba da nas na neki način zabrine. Koliko

sam razumio da je 10 – tak učenika upisano u gimnaziju za razliku od nekih prethodnih godina, a isto tako je i u drugim odjeljenjima, pa da Vijeće sugeriše menadžmentu škole da se u nekom narednom periodu malo više potrude oko upisa učenika u srednju školu da ne bi došli u situaciju da moramo određene struke da gasimo u nekim narednim školskim godinama.“

Refik Šuvalić, vijećnik SDA: „ Da vas sve selamim i pozdravim. Što se tiče ove godine to je završeno, što je upisano upisano. Mislim da bi šira društvena zajednica trebala bar u narednom periodu da razmišlja kada je u pitanju upis u srednju školu o određenim potrebnim zanimanjima. Ljudi rade sa nestručnim osobljem vezano za centralno grijanje, a mislim da se precizno zove vodoinstalateri i monter centralnog grijanja. Znamo da mi na ovoj našoj općini imamo više firmi koje se bave tim poslom i uglavnom rade sa malim brojem ljudi koji su tog zanimanja. Mislim da bi trebali planirati da se u narednoj školskoj godini obezbijede uslovi za formiranje jednog takvog odjeljenja. Znači predlažem da se u zaključku vezano za ovo što je načelnik govorio doda i to da bi se blagovremeno obavile pripreme i odradilo na nekim stvarima. Možda ima još nešto, ali ja, bar vezano za ono što sam čuo i što poznajem po pitanju toga i obzirom da sam iz te branše, mislim da bi sigurno bilo dobro za naredni period.“

Selmin Karić, predsjedavajući Općinskog vijeća: „Ima li još prijavljenih? Nema. Znači ko je za ovu informaciju uz zaključak da generalno nismo zadovoljni sa upisom broja učenika u Mješovitoj srednjoj školi i da je to odgovornost menadžmenta ustanove i da menadžment u budućem periodu treba puno više da se angažuje na lobiranju za upis učenika u Mješovitoj srednjoj školi Doboj Istok, te ako postoji mogućnost da se iznađe rješenje za upis jednog odjeljenja naredne školske godine monter centralnog grijanja i vodoinstalateri? Ko je za ovu informaciju uz zaključak?

*Glasanje: ZA – 8, PROTIV – 0, SUZDRŽANIH – 2
Informacija nije dobila potrebnu većinu.“*

Kemal Bratić, općinski načelnik: „Ja se ranije nisam htio javljati u toku inicijativa ili poslije inicijativa i sada osjećam potrebu da kažem nešto. Žao mi je što su kolege, vjerovatno iz opravdanih razloga, napustile sjednicu. Kada se podnosi bilo koja inicijativa o tome smo davno pričali i govorili da ona treba da sadrži sve one parametre ko, šta, kako i gdje. Koliko se sjećam bila je ova inicijativa za uređenje prostora trotoara i kolegica je rekla da to nije nadležnost općine, a jeste to od ove godine nadležnost općine i mi ćemo to uraditi. Ja ne vidim ko bi se usudio da na održavanje tih površina povede djecu ili da da djeci. Ja ne bih, jer sam radio taj posao i znam kako je to i zbog toga ja vama želim da čestitam, jer ste vjerovatno zbog toga odbili tu inicijativu, zbog opasnosti kojima bi bila izložena djeca. Mislim da su i ostale inicijative, da ih tako nazovem, političanske i nemaju neke svrhe i nemaju nekog posebnog opravdanja. Znači ponavljam namjerno se nisam htio javljati za diskusiju prije inicijativa, niti poslije na tačci prije glasanja o inicijativama, jer smatram da je većina tih inicijativa onako političanska i pokušavanje skupljanja određenih bodova. Znači isključivo sam se javio da kažem da ni u kom slučaju ne bi bilo dobro da je ova inicijativa bila usvojena i da Vijeće kaže hajte djecu vi uređujte javne površine na području općine Doboj Istok. Znači ako neko ima dovoljno prostora i dovoljno snage, volje i želje imamo mi dovoljno i šuma i javnih površina osim ovih da naše ekološke ili goranske sekcije rade taj posao za koji se i održava ta sekcija. Imao sam potrebu to da kažem.“

Selmin Karić, predsjedavajući Općinskog vijeća: „ Zahvaljujem se, načelniče. Zaključujem današnju sjednicu i zahvaljujem vam se na prisustvu.“

Sjednica je završena u 10,45 sati.

ZAPISNIČAR
Behara Hadžić

SEKRETAR OPĆINE
Omer Hadžić

PREDSJEDAVALAČI
OPĆINSKOG VIJEĆA
Selmin Karić

Službena zabilješka:

Zapisnik je usvojen na 11. redovnoj sjednici Općinskog vijeća Doboj Istok održanoj dana 24.11.2021. godine.

U Klokotnici, dana 26.11.2021. godine

*Zabilješku sačinio
Omer Hadžić, sekretar Općine*